

經文：馬可福音 16:1-8

馬可福音書是福音書中 siōng 短 ê 一本冊，mà 是 siōng 早完成 ê。馬可福音書為何在第八節「往加利利去」就結束？kah-ná 字句未續。新譯本有提供兩種增加結尾 ê 版本。有 kóa 古卷只加上一節，叫作短 ê 結束版，大約是第三世紀 ê 抄本。又有加上 9-20 節 ê 是第二世紀尾或是第三世紀 ê 抄本，叫作長 ê 結束版。加添 chit 段有可能是因為復活是 kui-ê 福音 ê 中心，福音書 lóng 是 tùi 復活 ê 角度來寫，若是無記載復活就 bô 算是完整 ê 福音書。20 世紀馬可福音 ê 研究有兩大成就，其中一項我 tī 正月初八 ê 講道已經指出就是「彌賽亞 ê 秘密」。另外一 ê 是德國聖經學者 Ernst Lohmeyer 指出馬可 ká 初代教會 ê 重心 khng tī 加利利 m̄ 是耶路撒冷。伊講：耶穌基督是加利利 ê 人；生活 tī 加利利民眾 ê 中間，是當地人人知 ê 人物（第一章）。伊開始傳道了後 chiah 離開加利利往耶路撒冷去（10:32）；復活了後，比學生 ka 早到加利利，tī-hia kap in 相見面（14:28；16:7）。馬太福音（26:32；28:10、16）用馬可福音作底本 mà 是 ká 初代教會 ê 中心 khng tī 加利利。Lohmeyer 認為加利利對耶穌是友善 ê，總是耶路撒冷對耶穌是充滿敵意 ê 所在，路加福音 kap 使徒行傳（1:4）long ká 焦點 khng tī 耶路撒冷，真少提起加利利 ê 記事，尤其是耶穌復活以後，大概 lóng tī 耶路撒冷 kap 附近活動（24:36-53），伊 ká 耶路撒冷看作聖 ê 所在。因為 Lohmeyer ê 研究，伊成做編輯批判 ê 先驅（precursor of redaction criticism）。尙續尾完成 ê 約翰福音書 mà 是以耶路撒冷作初代教會 ê 中心（20:19-29）。

今 á 日 ê 經文是發生 tī 耶穌互釘十字架到復活之間 ê 記事。到底發生什麼 t'ai-chì，hō 學生覺醒 chit 位受苦 ê 基督 kap 伊所傳 ê 信息，互 in 有生命轉變 neh?

重建信心：耶穌互人釘十字架了後，學生認為追隨基督 ê 希望破滅 lah，所以四散自保，有 ê tng 去掠魚。In bat 經歷著拉撒路 ê 復活，mà 知影耶穌一直吩咐第三工會復活，為何 in 等未赴耶穌復活就放棄 ah? 有一 pái 學青聚會 ê 時，問講：為何耶穌時代 ê 人看 tiòh 伊行濟濟神蹟竟然 iáu m̄ 相信？到底耶穌行神蹟有改變什麼無？伊行神蹟本是 beh 顯明家己 ê 身份 kap 使命，表明上帝國已經降臨。總是伊死 ê 時，天烏地暗，hiah-ê 人 kám 知影上帝國已經降臨？學生四散是因為 chhōe bē-tiòh 犧牲 ê 理由，彌賽亞怎樣 ē-tàng 互人釘十字架，這是 kap in ê 期待相違背 ê，當然無法度接受。這是學生 mà 是咱 ê 悲哀，親像講：某某人生病，眾人為伊禁食祈禱，後來病好 ah，hiah-ê 人 tō 將 chit 種經驗無限擴大，甚至提升到屬靈 ê 層次，成作基督徒有病不需要看醫生，只要迫切祈禱上帝一定 ê 醫治。一旦病情無改善，信仰就倒 ah，這 mà 是學生四散 ê 原因。Hō 學生生命產生改變 ê 關鍵 tī 第六節「伊已經復活 lah!」當學生 tùi 復活 ê 角度去看十字架 ê 時，信仰成作生命 ê 動力，是應允，是 ng 望，是生命 ê 連結，是 tī 經歷中去體驗上帝，這就是信仰 ê 開始，所以復活節 bē-sái 抽離受難節來慶祝，耶穌 ê 復活加倍學生 ê 勇氣，甚至連死 mà 不驚。外人 siōng-siōng 批評耶穌復活是學生 ê 幻覺，空墓可能是屍體互人偷拿去，按呢來要求 beh 看夠額 ê 證據。甚至有濟濟人 teh 哲學、教育、宗教、倫理道德，科學中去 chhōe 永生之道，in 永遠 mà chhōe bē-tiòh。當蘇聯第一個太空人 tng

到地球，伊宣布 tī 太空並無看 tiòh 上帝；美國 ê 第一個太空人 tng 來地球卻向記者表示 in tī 太空看 tiòh 上帝創造宇宙 ê 偉大。其實叫咱生命改變 ê m̄ 是空墓，是耶穌 ê 顯現，致到復活 ê 信息足足傳了二千外冬。所以除非咱遇著 chit 位復活 ê 主，願意站出來接受基督 ê 挑戰，成作新造 ê 人。Nà-bô 就是看見、聽到，mà bē 改變。

看著ng 望：耶穌斷氣是禮拜五 ê beh 暗 á。抹大拉 ê 馬利亞 kap 雅各 ê 母親在場，總是 in 無時間處理屍體就將伊安葬，了後回去守安息日(拜五暗六點時到拜六暗六點)。過了安息日，in 趕緊預備香料 beh 去抹耶穌 ê 屍體。He 是七日 ê 頭一日，就是禮拜日，天拂光，tī 路上 in iáu the 煩惱是誰 ê-thang kā 石頭 soah 開 neh?總是 bô 拍算，墓門竟然開 ê，石頭已經 soah 去邊仔。有一 ê 白衣天使對 in 講：「M̄免 gōng-ngiáh, lín 是 chhē 釘十字架 ê 拿撒勒人耶穌。伊已經 koh 活，無 tī chia; 你看，伊埋葬 ê 所在。」。In bo 歡喜，顛倒驚惶走去。驚惶是人類 kap 超自然接觸 ê 自然反應。馬太記載 chiah-ê 婦女是「又 gōng-giáh 又極歡喜」(28:8)，In 驚惶了後，漸漸歡喜 ê 心贏過著驚，這是 hō 人 m̄ 敢相信 ê 好消息，耶穌復活 lah! 伊照伊所應允 ê tng 來 lah! 咱有救了 ah, 所有 ê 事件攏有新 ê 意義 lah! tùi án-ne in 四界報揚。Tī 咱服事 ê 過程，lóng bat 經歷傷心、困擾 ê 時 chūn, 無論 t̄i-chì jōa-nih-á 艱難，beh 驚惶，要親像馬利亞耐心 thèng 候，一心一意到墓 hia, 上帝自然會替咱 soah 開大石頭，hō 咱安然度過，而且是拍斷腳骨顛倒勇。

生命 ê 轉變：對學生來講，雖然復活節是一生中 siōng 歡喜 ê 日子，總是耶穌留落來 ê 世界猶原有散赤、iau 餓、戰爭、犯罪、病痛等等。這一切 lóng tī 伊 ê 計畫內底，包括伊 ê koh 來，tī 權能 kap 榮耀中重整世界。耶穌將天國 ê 鑰匙交互咱這陣屬教會 ê 罪人。當耶穌互人賣 hit 夜，學生 ê 表現 hō 伊失望到極，總是約翰福音 13:1 講：「伊已經疼 tī 世間屬伊 ê 人，到尾亦疼 in」，又將國度交託 hō in。到底是什麼力量 hō chiah-ê 婦女一心行去墓 ē，致到頭一 ê 看著復活 ê 主？這就是疼 ê 力量，疼 hō 人無驚，疼 hō 人信靠，疼 hō 咱有夠額 ê 勇氣 kap ng 望。有人問德蕾莎修女，為什麼 ē-tàng án-ne 服事 ê 散赤人？伊講：「咱 ài 先默想耶穌，然後出去 chhōe 伊所化裝 ê 款式。」上帝揀選散赤 ê、iau 餓 ê、犯人、生份人來接受基督徒 ê 疼，伊講：「Lín 既然行伊 tī 我 ê 兄弟至微細 ê 一個，就是行伊 tī 我。」(太 25:40) 設使咱 tī 世間找無上帝 tī toh-loh, 真可能是咱 chhōe 不對方向，所以咱千萬不可看輕主內至微細 ê。咱 ài 多關心比較內向或木訥 ê 兄姊，hō in 對教會有歸屬感。

復活節 m̄-nā 是關係到一個人 tùi 死裡復活 na-tiāⁿ, 這復活 ê 信息正是今 á 日真 chē 互人 tún 踏 ê、互人奴役 ê iáu ē-tàng 行落去 ê 希望。奧古斯丁講：「祢 tī 阮 ê 目矙前升天，咱回頭悲傷，chiah 發現祢卻 tī 阮心內。」教會是耶穌道成肉身 ê 延伸，雖然猶原有痛苦 kap 失望，上帝 kap 咱全款 tī 忍受 tiòh, 甚至不算代價用伊 ê 子來贏回對咱 ê 應允，hō 咱 ē-tàng 又受上帝 ê 恩典，既然咱是追隨基督 ê 人，就應該將上帝疼 kap 恩典 ê 好消息帶 hō 世間人，這就是大使命，mà 是生命 ê 挑戰。因為耶穌 ê 死亡 m̄ 是結束，只是一個開始，代代繼續到主 koh 來！